



KENYATAAN MEDIA MAJLIS PELANCARAN PROGRAM KEMBARA PERPADUAN @ KAMPUS

17 April 2023, SHAH ALAM – YB Datuk Aaron Ago Dagang, Menteri Perpaduan Negara hari ini telah melancarkan Program Kembara Perpaduan @ Kampus, bertempat di Dewan Kuliah 500, UiTM Cawangan Selangor, Kampus Puncak Alam. Turut hadir adalah YBhg. Prof. Datuk Ts. Dr. Hajah Roziah Mohd Janor, Naib Canselor Universiti Teknologi MARA (UiTM). Program ini dianjurkan dengan kerjasama UiTM Cawangan Selangor, dan Yayasan Sukarelawan Siswa.

2. Belia memainkan peranan yang sangat besar dalam pembentukan sesebuah negara. Sumbangan dan penyertaan belia sangat diperlukan khususnya dalam menjayakan aspirasi Malaysia MADANI. Bertepatan dengan aspirasi Malaysia MADANI, Kementerian telah mengambil langkah proaktif dalam mempertingkatkan penglibatan belia melalui inisiatif Kembara Perpaduan @ Kampus.

3. Yayasan Sukarelawan Siswa (YSS) yang diletakkan di bawah Kementerian Perpaduan Negara mulai Disember 2022 berperanan untuk melahirkan pemimpin sukarelawan dalam kalangan mahasiswa yang merupakan salah satu usaha ke arah membudayakan semangat kesukarelawanan dalam kalangan belia khususnya dan rakyat Malaysia amnya. YSS kini merupakan salah satu (1) jentera di bawah KPN yang bertindak untuk membantu KPN dalam menggerakkan program Kementerian dan Jabatan di Institut Pengajian Tinggi Awam dan Swasta dengan lebih aktif lagi terutamanya aktiviti-aktiviti di bawah inisiatif Kembara Perpaduan @ Kampus

4. Kembara Perpaduan @ Kampus adalah merupakan program yang berorientasikan pengukuhan nilai jati diri dan semangat perpaduan dalam kalangan mahasiswa di Institut Pengajian Tinggi dengan memberi fokus kepada program-program yang melibatkan mahasiswa berteraskan tiga (3) kluster utama Kembara Perpaduan Malaysia MADANI iaitu:

- i. Semarak Kenegaraan;
- ii. Semarak Perpaduan; dan
- iii. Program Komuniti RAHMAH.

5. Pelbagai program telah diatur di bawah Program Kembara Perpaduan @ Kampus yang berkonsepkan Perpaduan Dalam Kepelbagaian. Program-program ini akan digerakkan secara bersama oleh Yayasan Sukarelawan Siswa dan Sekretariat Rukun Negara seluruh Malaysia. Kolaborasi program ini juga akan diperluas dengan penglibatan agensi-agensi belia seperti Institut Pembangunan dan Kecemerlangan Kepimpinan (i-LEAD), Pertubuhan-Pertubuhan Belia dan NGO. Senarai program yang akan dilaksanakan sepanjang tahun 2023 adalah seperti di Lampiran 1.

6. Pada majlis yang sama, Program Chit Chat Belia yang bertemakan “MADANI: Bersediakah Kita?” telah diadakan dan dibarisi oleh panel seperti Pow Mei Foong (Atlet Bola Jaring Kebangsaan), Ahmad Danial Nor Amin (Mahasiswa Jurusan Undang-Undang), dan Mohammad Imral Aqil Mohd Salehuddin (Penyampai Radio). Program ini telah disertai oleh lebih 2,000 orang mahasiswa (termasuk penyertaan dalam talian) dan mereka terdiri daripada ahli SRN dari beberapa IPT seluruh Malaysia. Sebanyak 8 siri Program Chit Chat Belia akan dilaksanakan di seluruh negara pada tahun ini.

7. “Aktiviti-aktiviti ke arah pengukuhan pengetahuan, pemahaman, penghayatan, penilaian dan pengamalan Rukun Negara dalam kalangan mahasiswa wajar diberi penekanan khususnya dalam membangun Malaysia MADANI. Justeru, program seumpama ini dilihat berupaya dijadikan platform mahasiswa untuk memperkasa semangat patriotisme, saling mempererat hubungan toleransi antara kaum dan menyemai semangat kebersamaan demi kemajuan negara, ” jelas Datuk Aaron lanjut.

Kementerian Perpaduan Negara

17 April 2023

-TAMAT-

Mengenai Kementerian Perpaduan Negara:

Kementerian Perpaduan Negara ditubuhkan pada 10 Mac 2020. Fungsi utama Kementerian Perpaduan Negara adalah untuk memacu agenda perpaduan nasional bagi memastikan kesejahteraan dan keharmonian rakyat Malaysia.

Pertanyaan media

Unit Komunikasi Korporat

Kementerian Perpaduan Negara

Tel: +603 8091 8041 Fax: +603 8888 8568 569

E-mail: pro@perpaduan.gov.my

No rujukan: KPN.UKK.100-15/5/4 Jld 2 (13)

Senarai Program Kembara Perpaduan @ Kampus

1. Diskusi Perpaduan: Chit Chat Belia Madani
2. Debat Perpaduan Peringkat Kebangsaan
3. Ekspresi Ikrar Rukun Negara
4. Integrasi Sosial Antara SRN (INSAN)
5. Konvensyen SRN
6. Jalinan Integrasi Nasional Mahasiswa
7. Kolum Perpaduan
8. Konferensi Perpaduan
9. SRN@Komuniti Madani
10. Perkemahan Perpaduan
11. Kempen Penanaman 1 Juta Bunga Raya
12. Pemerkasaan Ekonomi dalam Komuniti
13. Eksplorasi Alam Semulajadi “Kepelbagaian Asas Penyatuan, Keutuhan Untuk Negara” (K.A.P.K.U.N)